




ԱՄԱՆՈՐԸ ՀՈԳԵՎՈՐ ԾԵՄԱՐԱՆՈՒՄ

Դեկտեմբերի 31, հինգշաբթի: Անցնող տարվա վերջին օր:

Մայր Աթոռի դարավոր կամարների տակ ամանորյա ուրախ երեկո է: Ամենուրեք տիրում է ոգևորություն, աշխուժություն: Ինչ-որ արտակարգ մի ուրախություն համակել է բոլորին:

Հայկական քաղցրահամ մրգերով, զիններով և այլ տեսակի բարիքներով են ծանրաբեռնված հոգևոր ճեմարանի հանդիսությանց դահլիճում Ամանորի համար պատրաստված լիառատ սեղանները: Նրանց շուրջ համախմբվել են Մայր Աթոռի միաբանությունը, Գերագույն հոգևոր խորհրդի, Վերստուգիչ հանձնաժողովի, «Էջմիածին» ամսագրի խմբագրական կազմի անդամները, հոգևոր ճեմարանի դասախոսական կազմն ու ուսանողությունը, մայրավանքի պաշտոնեությունը և այլ հրավիրյալներ, որոնք անասհման երախտագիտությամբ են լցված դեպի Մայր Աթոռ ս. Էջմիածինը և նրա արժանընտիր Գահակալը:

Երեկոյան ժամը 19.30-ին Վեհափառ Հայրապետը, տ. Հայկազուն, տ. Կոմիտաս, տ. Հուսիկ արքայազնների ընկերակցությամբ, մուտք է գործում դահլիճ, արտագին ծափահարությունների ներքո, և օրհնում ամանորյա սեղանը:

Սեղանների շուրջ ստեղծվում է ջերմ, ընտանեկան մթնոլորտ:


Ամանորյա սեղանը ղեկավարում է հոգևոր ճեմարանի տեսչի պաշտոնակատար արժ.

տ. Հովհաննես քհն. Մարությանը: Տեր հայրը գեղեցիկ մի ուղերձով դիմում է ազգիս Վեհափառ Հայրապետին՝ շնորհավորելով Նորին Սրբության Նոր տարին, ապա վեր է հանում հավիտենականության գիրկն անցնող հին ու եկող նոր տարվա խորհուրդը, ինչպես նաև մարդկային կյանքի նպատակը. «Մարդ արարածը, որը Աստուծո ստեղծագործության գլուխ-գործոցն է, իր գոյությունը հավերժացնելու, իր նվաճումները արձանագրելու համար ստեղծել է հավիտենականության մեջ ժամանակի հասկացությունը, իսկ նոր տարին մարդու համար դարձել է անվախճան ժամանակի, միշտ վերանորոգվող կյանքի խորհրդանիշը:

Մարդ էակի նպատակը պետք է լինի կյանքը լցնել աստվածահաճո, բարի, հիշարժան գործերով, որովհետև կյանքը մարդուն տրված պարգևն է հավիտենականության մեջ կենդանի մնալու համար»,—ասում է տեր հայրը:

Վերջում տ. Հովհաննես քահանան, դիմելով Հայոց Հայրապետին, ասում է. «Նոր տարին Ձեր շուրջը համախմբվելու և մեր ոխտերը վերանորոգելու առիթ է: Թույլ տվեք, Վեհափառ Տեր, հոգևոր ճեմարանի տեսչության անունից շնորհավորել Ձեր Նոր տարին, մաղթել Ձեզ երկա՛ր, երկա՛ր խաղաղ, երջանիկ ու ստեղծագործ տարիներ»:

Այնուհետև Մայր տաճարի լուսարարապետ տ. Հայկազուն արքեպ. Աբրահամյանը առաջին բաժակն առաջարկում է բարձրաց-



նել Մայր Աթոռի անասանության, պայծառության և նրա արժանավոր գահակալ Ամենայն Հայոց Վեհափառ Հայրապետի թանկագին կենաց արևշատության համար:

Բոլոր ներկաները հոտնկայա բաժակ են բարձրացնում Մայր Աթոռի հավերժության և նրա Գահակալի կենաց:

Խանդավառ մթնոլորտում ճեմարանի երգչախումբը կատարում է «Էջ Միածինն ի Հօրէ» շարականը:

Ամանորի սեղանների շուրջ ստեղծված խանդավառությունը կրկնապատկում են հոգեվոր ճեմարանի սաները՝ իրենց արտասանություններով և երգերով: Ճեմարանի երգչախումբը, Խորեն Մելիքանյանի շնորհալի ղեկավարությամբ, կատարում է «Ճեմարանի քալերգ», «Կաղանդ է այսօր», «Սեղանն է առատ», «Հայոց գինի», «Երևան բաղ եմ առել», «Հրեքունի», «Կենաց երգ», «Հոյ մար», «Ֆոռկա, Ֆոռկա», «Գարուն Երևան» խմբերգերը:

Գ դասարանի ուսանող Պ. Բեսարյանը արտասանում է Գ. Սարյանի «Օրացույց»-ը, Ա լսարանի ուսանող Վ. Նաջարյանը՝ Դ. Վարուժանի «Յան»-ը, Ա դասարանի ուսանող Ա. Բաբուջյանը՝ ռուսերեն մի ոտանավոր՝ Նոր տարվան նվիրված:

Գ դասարանի ուսանողներ Ա. Արթինյանը և Հ. Աղաջանյանը դաշնամուրի վրա կատարում են Ա. Խաչատրյանի «Կոպակ» ստեղծագործությունը, Բ դասարանի ուսանող Կ. Հովնանյանը՝ Շոպենի «Վալս»-ը:

Հոգևոր ճեմարանի ուսանողության անունից Վեհափառ Հայրապետին ուղղված ուղերձ-շնորհավորական խոսք է ասում Ա լսարանի ուսանող Ա. Արաքաջյանը: Նա վստահեցնում է բոլոր ներկաներին, որ հոգեվոր ճեմարանի ուսանողները այսուհետև կձգտեն է՛լ ավելի լավ սովորել, զինվել հավատքով ու գիտություններով՝ իրականացնելու համար իրենց վրա դրված բոլոր հույսերը: Իր խոսքի վերջում նա ասում է. «Մի րեւի Վեհափառ, թող Ձեր սուրբ Աջը մի՛շտ հովանի լինի մեզ, թող Ձեր հայրական սերը

մի՛շտ անպակաս լինի մեզանից, որպեսզի մենք առավել խանդավառությամբ և հավատքով սովորենք և պատրաստ լինենք վաղվա մեր սուրբ ծառայությանը»:

Նոր տարվա խոհերով համակված, հուզիչ, շերտ երույթներ են ունենում՝ վրահայոց թեմի առաջնորդ տ. Կոսիտա եպս. Տեր-Ստեփանյանը, ուխտավորաբար Մայր Աթոռում գտնվող հոստոնի սիմֆոնիկ նվագախմբի մենակատար, մեծանուն երգեհոնահար Պ. Ժամկոչյանը, «Էջմիածին» ամսագրի խմբագիր Ա. Հասիտյանը, հոգևոր ճեմարանի դասախոս Ա. Անթոնյանը:

Այնուհետև խանդավառ մթնոլորտում ելույթ է ունենում Վեհափառ Հայրապետը և Նոր տարվա առիթով տալիս է բոլոր ներկաներին Իր հայրական պատգամներն ու օրհնությունը՝ արտեսանող կերպով շարունակելու այս մեծ Հաստատության պայծառության համար կատարվելիք սուրբ աշխատանքները:

Հոգևոր ճեմարանի Գ լսարանի ուսանող Արտաշես արկ. Մուշեղյանը գրական դիպուկ և զվարճալի «կաղանդեքեր» է բաժանում միաբանությանը և ճեմարանի դասախոսական կազմին:

Մի պահ հանգչում են դահլիճի լույսերը: Հոգևոր ճեմարանի երգչախմբի սղաները վառ մոմեր ձեռքերին շարքով մտնում են դահլիճ, տեղ գրավում դաշնամուրի մոտ և մոմերի դողդուջուն ու փայլփլող լույսերի տակ խորհրդավոր ու մեղմորեն երգում են՝ ս. Ծննդյան խորհրդին նվիրված տաղեր ու երգեր: Դաշնամուրի վրա ընկերակցում է երգեհոնահար Պ. Ժամկոչյանը:

Փոքր ընդմիջումից հետո, հանդիսության վերջում, տեղի է ունենում վիճակահանություն: Ներկաներից շուրջ 15 հոգի նվերներ են շահում վիճակահանությամբ:

Ժամը 23-ին խանդավառ մթնոլորտում, Վեհափառ Հայրապետի «Պահպանիչ»-ով և խմբովին երգված «Հայր մեր»-ով, ավարտվում է ամանորյա հանդիսությունը հոգեվոր ճեմարանի հարկի տակ:

